



28. Aprili 2026

UPA2026/38

Uunga siunnersuut: Ilageeqarneq pillugu Inatsisartut inatsisaata allanngortinneqarnera pillugu Inatsisartut inatsisaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Ilageeqarneq pillugu Inatsimmut allannguutissatut siunnersuummik saqqummiussinerannut Siumumit Naalakkersuisut qutsavigaakka. Ilagiit nunatsinni immikkut inissisimapput, tassami taakkuupput kulturitsinnut, oqaluttuarisaanitsinnut aammalu kinaassutsitsinnut pingaaruteqartorujussuarmik inissisimasut.

Taamaattumik pingaaruteqarpoq inatsisissatut siunnersuut manna mianersortumik aammalu ataqqinnittumik suliarineqarnissaa.

Ilageeqarneq pillugu inatsisip nutarterneqarnissaanut aammalu ullutsinnut naleqqussarneqarnissaanut Siumut pitsaasumik isiginnippoq. Inuiaqatigiit allanngoriartorput, taamaattumillu aamma ilagiit aaqqissuussaananerata aammalu ingerlatsinerata malinnaasariaqartoq. Kisianni pingaaruteqartoq tassaavoq ilagiit inuiaqatigiinnut qaninnerpaajuaannarnissaat aammalu inuiaqatigiinni pingaaruteqarlutik inissisimanerata attanneqarnissaa.

Ilagiit nunatsinni tamarmi, provsteqarfinni, illoqarfinni aammalu nunaqarfinni, innuttaasunit qanimut tikinneqarsinnaanissaat Siumumit pingaartiparput. Ilagiit inuiaqatigiinni ataatsimoornermik pilersitsisarput aammalu innuttaasut akornanni pingaarutilimmik inissisimallutik.

Taamatuttaaq pingaaruteqarpoq ilagiit kalaallisut ingerlatsinermik tunngaveqarnissaat aammalu kalaallit kulturiannik aallaaveqarnissaat. Tamanna ilagiit innuttaasunut qaninnerulersittarpai aammalu inuiaqatigiinni upperisaqarnerup naleqassusaa nukittorsartarlugu.

Siumut isumaqarpoq inatsisissatut siunnersuut manna ilagiit pillugit aaqqissuussinermut pitsaanerusumik sinaakkuteqalersitsissasoq aammalu ilagiit siulersuisuisa, provsteqarfiit aammalu biskoppip akornanni akisussaaffiit erseqqissarneqarnissaat iluaqutaassasoq.

Peqatigisaanillu pingaaruteqarpoq allannguutit siunnersuutigineqartut ilagiit ulluinnarni ingerlatsinerannut pitsaasumik sunniuteqarnissaat aammalu sulisut atugaat aammalu periarfissaat eqqarsaatigineqarnissaat.



Taamaattorli Siumumit isumaqarpugut tusarniaanermi piffissaritinneqartoq eqqarsarnartoqartoq, decemberimi juullip nalaani ingerlanneqarsimammat. Ilaatigut palasit susassaqtartut allat eqqarsaatigalugit piffissaq ulapaaleruttorfigimmassuk taamaalilluni akissuteqarsinnaanerit killeqarsinnaalluni.

Siumumiittaaq oqaatigissavarput soraarsitsisarnermut tunngatillugu eqqortumik pisortanik tunngavilimmik ingerlasoqarnissaa peqataatitsisoqartarnissaalu pisariaqartoq.

Ilageeqarneq tamaat aatsimut isigalugu nukittorsarneqartariaqarpoq, ilanngullugu eqqaanngitsoorusunngilarput ilagiinnut qinersisoqarnerata kingorna arlaatigut nukittorsaataasumik soorlu pikkorissaasarnernut isumasioqatigiittarnernut aningaasassaqqullugit, aningaasanut sinaakkutaasut qaffanneratigut. 50 mio-ninnguit naammakkunnaarnerat oqallinnermi eqqaaneqarmat.

Naggataatigut oqaatigissavara Siumumit siunnersuut taperseratsigu, tassami isumaqaratta ilagiit nunatsinni pingaaruteqarlutik inissisimanerat aammalu siunissami ineriartortinneqarnissaat pingaaruteqartoq. Siunnersuut manna ilagiit inuiaqatigiinni pingaaruteqartumik inissisimanerata attanneqarnissaanut aammalu nukittorsarneqarnissaanut periarfissiivoq.

Taamaattumik Siumup siunnersuut taperserpaa, qulaani taasagut qulaajarneqarnissaat aappassaaneerreqannginneranilu Kultureqarnermut ataatsimiititaliamut suliassanngortinneqassasoq inassutigaa.

Lars Poulsen, Siumut